



A LA ROYNE REGENTE,  
ET A NOSSEIGNEURS LES PRINCES,  
& Seigneurs du Conseil.

MADAME,  
**M** l'Vniuersité de Paris remon-  
stre en toute humilité à vo-  
stre Majesté, que la doctrine du mas-  
sacre des Roys par assassins, qui par  
pieté se deuoient à la mort, com-  
me à vn Martyre agreable à Dieu.  
est vne engeance pestifere non iamais  
veüe ny leüe dans tous les memoires  
de lantiquité : Ni les Payens, ni les  
Chrestiens ne l'ont iamais cogueüe.  
Entre les Mahometans vn seul appellé  
le vieil de la Montagne s'en est serui,  
mais les autres de la mesme secte la  
suffoquerent aussi tost, & oncques puis  
ils ne s'en sont seruis, bien que leur hai-  
ne contre les Roys Chrestiens ne soit

pas diminuée: Depuis soixante ans seulement ou environ, ceste peste s'est semée dans le Christianisme & pratiquée en Angleterre & en France. nous disons en Angleterre, d'autant que pour l'obeissance ciuile & temporelle des Roys & pour la seureté de leurs vies, tous Roys Chrestiens, Payens, heretiques, idolastres, infidelles, Excommuniez, apostats, nous sont saints & sacrez, ainsi que les Apostres l'enseignent, & l'ancienne Eglise Chrestienne, & l'exemple des Saints de Paradis, qui ont esté Prelats & Euesques de France. Or ceste doctrine infernale s'est appuyée & fondée sur vne autre doctrine erronée, qui est de la toute puissance du Pape, que nous reconnissons chef de l'Eglise, en la façon que nos ancestres l'ont recogneu. La doctrine de ceste toute puissance ne se trouue point dās les escrits de la Theologie de Paris, ny dans le sein de l'Uni-



uerfité, ains elle se trouue dans les sermons & escrits des Iesuites, & dans les responses des assassins, quand ils sont interrogez par les Iuges. Pour l'asseurer de cela il les faut ouyr parler. Parrey qui entreprit d'assassiner la Roynie d'Angleterre; dit qu'il le pouuoit faire, parce qu'elle estoit excommuniée par le Pape, & que partât sa vie estoit abandonnée. Catesby entrepreneur de ceste fougade qui deuoit enleuer le Roy de la grand Bretagne, la Roynie, ses enfans, & les Estats d'Angleterre, a respondu que ceste entreprise estoit sainte: car puis que Clement 8. auoit defendu par deux brefs de le receuoir, à plus forte raison, vouloit il qu'estant reçu il fust osté de son siege. Iean Chastel dit qu'il estoit meritoite de tuer le feu Roy, pour ce qu'encor que les Euesques de France l'eussent reçu & mis en l'Eglise, toutesfois il n'y estoit point, le Pape ne l'ayant point reçu.

Rauaillac le dernier assassin dit que le Roy faisoit la guerre contre la volonté du Pape, que Dieu estoit le Pape, & le Pape estoit Dieu par ces paroles, Tu es Pierre, & sur ceste pierre &c. En conséquence de cela, l'Euesque de Clermont leur disciple, ne faillit apres le supplice du meurtrier, de se trouuer à l'assemblée de Sorbone, qui se faisoit à l'imitation de nos ancestres, pour la condamnation de la doctrine des assassins, où allant par toutes les bandes auant que les Docteurs fussent assis, il leur disoit, Prenez garde à ce que vous faites, vous auez icy deux Nonces Apostolicques: & la compagnie ayant pris place, il opina que la question qui se presentoit, auoit esté traittee diuersement, & qu'il estoit besoin d'en parler aux Nonces, qui en rescriroient au Pape: comme si autres Roys ne deuoient viure que ceux qu'il plairoit au Pape. Apres que plusieurs bons prescheurs



de ceste Vniuersité eurent detesté les  
meurtres des Roys & les fauteurs de  
ceste doctrine, en fin P. Coton vous  
presenta, Madame, vne lettre declara-  
toire de la doctrine des Iesuites en ce-  
ste matiere, de la quelle il a voulu con-  
tenter tous ceux qui se plaignoient que  
leurs escrits establissent trop ces trois  
doctrines proches & voisines, la toute  
puissance des Papes, & en consequen-  
ce d'icelle, la rebellion contre les Roys,  
& l'abandonnement de leurs vies, lors  
que telles gens veulent les surnommer  
ou estimer tyrans. Beaucoup de gens  
d'entendement recognoissent assez les  
equiuocques & fallaces dont il couure &  
cache sa mauuaise doctrine, suiuant  
l'usage dont la secte fait profession par  
traictez exprez approuuez par le ge-  
neral, comme on voit en l'Apologie  
de Henry Garnet, au chapitre des  
equiuocations. Nous serions pourtant  
bien marris de les decouurir, & d'em-

pescher que la faulſe monnoye n'eust  
cours pour quelque bien qui en peut  
reuenir: Mais puis que par le merite de  
ses fallaces, la secte veut gagner ce  
point que d'enseigner la ieunesse en  
l'Vniuersité de Paris, contre la volonté  
constante & determinée du feu Roy,  
ceste Vniuersité fille des Roys de  
France, se sentiroit coupable d'infide-  
lité si elle ne vous découuroit ces falla-  
ces, & si elle ne supplioit vostre Maje-  
sté de ne vouloir permettre que ceste  
fille tres-fidelle aux Roys, tant que l'on  
ne la laisse corrompre & forcer, ne soit  
point corrompue par la compagnie  
d'une secte ja tant esprouuée, tres-per-  
nicieuse aux Roys. Il vous dit donc,  
Madame, que les auteurs de son or-  
dre disent qu'il ne faut pas tuer vn ty-  
ran, mais les auteurs par luy alleguez,  
& sur tout Valentia, leur dernier  
grand Docteur, y apporte vne limita-  
tion telle, Si ce n'est, dit il, par iuge-



ment public. Or à fin que vous ne doutiez point, quelle est ceste autorité publique, il vous couche par apres des articles de leur doctrine sur l'autorité des Roys en ceste façon; Que la Monarchie est le gouuernement le meilleur, que le Pape est Monarque en l'Eglise pour le gouuernement spirituel, & le Roy en son Royaume pour le temporel: ne voulant point que le Roy soit Roy en son Royaume, si le Pape n'est monarque, & n'a puissance absoluë au gouuernement spirituel de l'Eglise: Mais, Madame, c'est chose d'autout contraire à la doctrine de l'Eglise, laquelle vostre Vniuersité de Paris a tousiours maintenüe, que le Pape ait en l'Eglise vne puissance Monarchique: car ce sont choses contraires que le Concile soit par dessus le Pape, comme vostre Vniuersité l'a tousiours defendu, & que le Pape soit Monarque absolu en l'Eglise. La doctrine de vo-

stre Vniuersité, si autrefois elle fut nécessaire, elle l'est maintenant plus que jamais, & au Roy & à tous les Royaumes de la Chrestienté.

Quels sont les effets de ceste Monarchie spirituelle absolüe, il vous le dit bié clairement en vn autre liure qu'il presente à vostre Majesté, Madame, & à vous Nosseigneurs les Princes, & Seigneurs du Conseil du Roy; C'est à la fin du second tome de son institution, en la question 35. où il dit que le Pape n'a point de puissance absolüe d'oster & donner les Couronnes & Royaumes des Roys. Toute sa fallace est en ce mot (absolüe) car il dit: qu'il a puissance d'oster & donner les Couronnes des Roys, mais qu'il ne l'a pas absolüe. Le Roy & vostre Majesté, Madame, & vous, Nosseigneurs, ne pretendez pas aussi vne puissance absolüe de donner & oster les biens à vos sujets, ains seulement par la raison de la Iustice.

Aussi



Aussi dit P. Coton peu apres, que le Pape en vertu de son gouuernement spirituel & pour la conjunction de la religion & de l'estat, du spirituel & temporel, peut en vertu de ses censures conjointement disposer des Couronnes des Roys, pour la religion, pour le seruice de Dieu, pour le bien de l'Eglise & pour le salut des ames: & cela ne luy est point vne doctrine particuliere, ains elle est commune à toute la secte. Or ceste doctrine de la conjunction qu'il dit estre entre la religion & l'estat, le spirituel & le temporel, est du tout contraire à la doctrine de nostre Seigneur IESVS CHRIST, qui a mis pour iamais vne separation grande entre la religion & l'estat, en disant: Rendez à Dieu ce qui est à Dieu, à sçauoir la religion & à Cæsar ce qui est à Cæsar, asçauoir l'obeissance ciuile & temporelle, l'honneur, le seruice & le tribut. Vostre Vniuersité de Paris, Madame,

l'a tousiours ainsi enseigné, se tenant aux antiens Conciles, reiettant les nouveaux, en ce qu'ils ont contreuenue à ceste saine doctrine. Et c'est enquoy les Roys, les Euesques de la France, les Parlemens, les Conseils du Roy, les Docteurs François, & vostre Vniuersité, ont tousiours dit consister la liberté de l'Eglise Gallicane & du Royaume de France. Il n'est pas en cela question de peu, il n'y va que de l'Estat du Roy, que ces hommes disent que le Pape luy peut oster: ces hommes, dis je, à qui l'on fie aujourd'huy l'institution de la jeunesse par routes les villes, les consciences du peuple aux confessions, l'institution & l'enseignement des grands & des petits. Il y va encore de la vie du Roy, & de la vostre, Madame, car quand le Pape a osté à vn Prince le droit de regner, ils le tiennent pour vn tyran, qui occupe vn estat contre le iugement de ceste authorité publicque, qui peut par



la doctrine des Iesuites faire d'un Roy, vn tyran Et si disent bien encor que les sujets se peuuent esleuer contre leur Prince, ores qu'il ne soit pas excommunié, s'ils croient que par la crainte de sa puissance on ne l'ose excommunier. Telle est la decision du Iesuite Suares, qui met par la l'estat & la vie de tous les puissans Princes en vne merueilleuse incertitude. Telle est aussi la pratique de quelques assassins des Roys, gés qui recognoissent la toute puissance du Pape, enseignée par les Iesuites & qui n'en recognoissent point d'autre, sinon autant qu'il plait au Pape. Et telle est manifestement la pratique du dernier assassin, comme il apparoissoit par ses discours execrables avec les Theologiens qui luy furent enuoyez, auxquels il se monstroit parfaitement instruit en toutes les caillations & fallaces dót la scphistique vse en ceste matiere, luy qui leur paroissoit & estoit vrayement

& parfaictement ignorant en toute autre chose.

Nous ne doutons pas, Madame, que le Pape bien conseillé ne face son de-  
voir en damnant par vne bulle aux pei-  
nes infernales tels meurtriers & assas-  
sins, & faisant cesser par vne seule paro-  
le, comme il peut, ces grands maux qui  
font honte & opprobre à l'innocence  
de la religion Chrestienne Car iulques  
icy le pouuoir de telles gens à Rome a  
donné occasion à quelques vns de di-  
re, que qui n'empesche ou ne preuient  
pas les crimes commis par ceux sur les-  
quels il a toute puissance, & qu'il peut  
faire cesser par vne si facile condemna-  
tion, il en est luy mesme l'auteur, ainsi  
que enseingnēt les regles de la Iustice.

Le pretexte que prend P. Coton du  
bien de l'Eglise, pour donner puissance  
au Pape d'oster & donner les Couron-  
nes, est vne faulx couleur : Car par la  
mesme separatiō que nostre Seigneur



IESVS-CHRIST à fait pour iamais de la religion & de l'estat par toute la terre où il veut que sa foy soit preschée, nous sommes tenus nonobstant toutes césures ecclesiastiques, interdictiós, dispenses de serment de fidelité, commandemens du Pape de nous esleuer contre nos Roys, de leur rendre toute obeissance ciuile & temporelle, & pour la defense de leurs vies, exposer la nostre propre. Cela est vne loy naturelle, escrite au cœur des hommes dès lors qu'ils viennent en ce monde, que le Fils de Dieu prenant chair humaine a cõfirmée & consacrée, obligeant à l'observation d'icelle les Chrestiens plus estroitement que n'estoient les Payens, par la seule lumiere naturelle, & les Prestres plus que les laiques à qui ils doiuent enseigner ceste saine doctrine, & par parole & par exemple, plus aussi les Euesques que les Prestres, & plus encor le premier des Euesques que

tous les autres, pource qu'il doit en celle plus d'exemple aux Chrestiens que tous les autres pasteurs de l'Eglise. C'est aussi pourquoy le Roy de la grand Bretagne pour se garantir de tels assassins, a esté contrainct de demander à ses subjects vn serment de fidelité pour son obeïssance ciuile & temporelle, & pour la seureté de sa vie, nonobstant toutes censures Papales.

Serment que la doctrine & la fréquence des assassins rend aujourdhuy necessaire par toute la Chrestienté, pour asseurer l'estat & la vie des Oincts de Dieu, & pour décharger la religion Catholique Apostolicque & Romaine enuers les Roys & Princes de la terre, du blasme & de la haine que luy procure ceste mauuaise doctrine, & pour la rendre encor plus digne de faueur enuers les Princes qui tiennent religion differente. Mais encor plus en France qu'en tout autre pays ceste



saine doctrine est necessaire, puis que les effects de la contraire tombent principalement sur la vie de nos Roys & sur la couronne de France. Et plus encor sous le bas aage de nostre Roy que lors de sa majorité, la fausse doctrine doit estre combatuë, & les auteurs d'icelle reiettez, pour ce que la pratique du passé a tousiours enseigné que quand l'on veut employer les censures contre le temporel des Roys, l'on n'excommunie que les plus foibles.

A ces causes, Madame, l'vniuersité de paris fille des Roys de France supplie tres.humblement vostre Majesté, & vous Nosseigneurs les princes & Seigneurs du Conseil du Roy, de ne vouloir permettre que les Iesuites ayans vne doctrine sur la toute puissance du pape, sur la seureté de l'estat des Roys & de leurs vies, contraire à la saine doctrine que l'Vniuersité a tousiours maintenuë, instruisent aux lettres la

jeunesse à Paris : moins encor qu'ils  
 soient associez au corps de l'Vniuersité,  
 pour rendre la doctrine & les mœurs  
 d'icelle aussi cōtraires à l'estat des Roys  
 comme est leur secte, ainsi qu'il se voit  
 par les escrits que p. Cotton vous adres-  
 se & vous donne tous les iours en leur  
 nom, & par l'experience qui s'en est  
 faite & s'en fait encor en plusieurs en-  
 droits de la Chrestienté : & l'Vniuersi-  
 té priera Dieu pour la conseruation &  
 prosperité du Roy, de vostre Majesté,  
 Madame, & de vous. Nosseigneurs les  
 princes & Seigneurs du Conseil du  
 Roy.